

Kalifornija je jedna od 14 američkih saveznih država u kojoj je dozvoljena upotreba marijuane iz zdravstvenih razloga. Stoga se u toj državi razvila uspješna industrija uzgoja kanabisa. Iako organi savezne vlasti kažu da je upotreba marijuane zabranjena zakonom, predstavnici administracije predsjednika Obama nedavno su izjavili da neće sudski progoniti ordinacije koje se pridržavaju državnog zakona. Klinike koje koriste marijuanu šire se Kalifornijom. Ta je pojava unijela razdor među one koji žele zabraniti, i one koje žele legalizirati marijuanu.

U kalifornijskom gradu Oaklandu smješten je najveći zdravstveni centar u toj državi za liječenje marijuanom: u njemu se dnevno opslužuje 600 pacijenata. Marijuana se prepisuje za pomoć pri liječenju cijelog niza bolesti – od raka do nesanice. Steve DeAngelo utežitelj je i direktor tog centra: "Kada primimo nekog pacijenta po prvi put, tražimo ga da s nama potpiše ugovor. Njime potvrđuje da će biti članom našeg centra i ovlaštjuje sve naše članove da za njega uzbajaju konoplju."

Kalifornijski su glasači odobrili zdravstvenu upotrebu marijuane 1996. godine, kad su usvojili Prijedlog 215, poznat kao Compassionate Use Act, svojevrsni zakon o 'milosrdnoj' uporabi marijuane. Njime je pacijentima, uz doktorsku preporuku, dozvoljeno da uzbajaju i posjeduju marijuanu za ličnu upotrebu. Taj je zakon kasnije proširen kako bi dozvolio pacijentima da dijele ovaj lijek s drugim kolektivnim centrima i zadrugama.

Centar Steevea DeAngela ima 30 hiljada registriranih članova i godišnji prihod od 20 miliona dolara. Učlanjenim pacijentima na raspolaganju za kupovinu su sojevi marijuane slikovitim naziva poput Blue Dream, Plavi san i Train Wreck, Udes vlaka. Korisnik marijuane u zdravstvene svrhe iz Long Beacha u Kaliforniji Bill Britt kaže da mu ovaj lijek pruža olakšanje. Kao dijete bolovao je od dječje paralize, a uzimanje marijuane kao lijeka smanjuje mu količinu drugih lijekova. Nekoliko puta na dan udiše marijuanu putem inhalatora: "Da ne koristim marijuanu, vjerojatno bih bio na lijekovima protiv boli, ili nekoj vrsti mišićnih relaksansa ili antispazmodika, ili pak nekim lijekovima protiv mučnine, a možda i anti-depresivima. Postoji cijelo brdo popisa lijekova za moje stanje."

Broj klinika koje koriste marijuanu ubrzano niče Kalifornijom. Oni koji žele otvoriti vlastite, priliku da nauče kako to mogu postići pruža im Univerzitet Oaksterdam u Oaklandu. Njega je osnovao Richard Lee, lokalni poduzetnik i vlasnik kafića i klinike marijuane. On kaže: "Nakon što usvoje osnove o političkim i pravnim regulativama i implikacijama, studenti pohađaju predavanja o hortikulturi, zatim kuhanju s konopljom, pravljenju hašiša, njezi pupoljaka, kao i o poslovanju te osnivanju vlastitog biznisa."

U Los Angelesu postoji preko 800 klinika kanabisa, više nego kafića Starbucks ili, recimo, javnih

Škola. Neke su od njih, tvrde gradske vlasti, nezakonite, pa se za njih predviđa policijska akcija. Udruga kalifornijskih policijskih načelnika protivi se širenju ovakvih klinika. Načelnik Kim Raney iz grada Covina-e kaže da marijuana pomaže nekim bolesnicima, ali dodaje da se radi o vrlo malom broju ljudi, ne više od dva posto: "Vjerujem da kod ljudi oboljelih od raka, multiple skleroze, i onih s nizom drugih zdravstvenih problema marijuana vjerojatno pomaže. Nas ne brine to, već ostalih 98 posto – koliko ih, prema našim informacijama, ima – to što se za njih legalizirala rekreacijska upotreba marijuane."

Američka uprava za kontrolu hrane i lijekova tvrdi da nije dokazana ljekovitost marijuane, no neki kalifornijski doktori, od kojih i David Bearman, kažu da ona pomaže njihovim pacijentima: "Neki od njih imaju nevjerojatna iskustva. Jedan moj pacijent bio je paraplegičar i patio od mučnih bolova."

Doktor Bearman preporučuje marijuanu za niz bolesti, uključujući i hronične bolove. Oni koji se zalažu za legalnost ove droge kažu da bi se na nju trebao nametnuti porez i da bi je trebalo tretirati kao alkohol i duhan, što je već učinjeno u Oaklandu. No, protivnici kažu da se marijuanu ne bi smjelo ozakoniti bez potrebne rasprave na nacionalnom nivou. Njihovi argumenti odnose se još na nepoznate dugoročne učinke upotrebe te biljke. Obje se strane, međutim, slažu da o dostupnosti marijuane u budućnosti moraju odlučiti sudske vlasti.

Izvor: VoA News

www.medicina.ba

2009-11-13